

APERITIO ORIS (1)

SUMMARIUM.—I. Terminologia.—II. Fontes.—III. Schemata ad Codicem Iuris Canonici.—IV. Definitio.—V. Notio confirmationis in forma communi et specifica.—VI. Effectus confirmationis.—VII. Praesumptio in casu dubii.—VIII. Iudex in casu dubii.—IX. Auctor concessionis.

I. Terminologia.

Terminus “aperitio oris”, usitatus in iure ante Codicem vigente, non amplius expressis verbis occurrit in Codice, sed solum implicite in can. 1.683 huius tenoris: “Iudex inferior de confirmatione, a Romano Pontifice actui vel instrumento adiecta, videre non potest, nisi Apostolicae Sedis praecesserit mandatum.”

II. Fontes.

Fontes huius canonis sunt: cc. 1, 2, X, II, 30; c. un., II, 7, in Clem.

III. Schemata ad Codicem Iuris Canonici.

Schemata ad hunc canonem retinent vocem aperitionis oris. Quae Schemata pro interpretatione citati canonis haud parvi momenti sunt; ideo

(1) Sermo est in hoc articulo de aperitione oris relate ad Acta data a Sede Apostolica in sensu can. 7; non tangitur aperitio oris in creatione Cardinalium. Romanus Pontifex in Consistorio secreto claudit, ut de more, os novis Cardinalibus. De vi luridica huius Caeremoniae confer C. *Vacante Sede*, 25 dec. 1904, n. 30, quae ita sonat: “Postquam aliquis S. R. E. Cardinalis in Consistorio creatus fuit, is statim vocem et ius eligendi Pontificem habet, et consequenter etiam cardinalitius galerus nondum illi traditus sit, neque os clausum, vel si clausum fuerit, nondum tamen apertum sit. Etenim huiusmodi claudendi oris ritus ad praecipuam Cardinalium facultatem, quae circa Summi Pontificis electionem versatur, non pertinet, sed caeremonia quaedam est, ea de causa introducta, ut Cardinales, antequam in Consistoriis et Congregationibus suffragium ferant, de modesta, quae ab ipsis in his et aliis actibus adhiberi debet, quodammodo admoneantur.” In eodem Consistorio aut in sequenti Romanus Pontifex novensilibus Cardinalibus *os aperit*, ut in Consistoriis, Congregationibus aliisque functionibus cardinalitius suas valeant sententias proferre. Etiam in vita monastica datur aperitio oris; v. g., *Rituale Monasticum Congregationis Beuron. O. S. B.*, in l. II, c. IV, “Ordo ad faciendum monachum”, n. 2, haec habet: “Aperitio oris, n. 26. Etsi Neoprofessus solemniter Professione iam omnibus iuribus fruatur, tamen intra triduum in Choro Psalmum aut Antiphonam non imponat. N. 27. Triduo elapso (vel urgente necessitate iam prius) et solis monachis in Capitulo Congregatis, Magister novitiorum (Praefectus clericorum) Neoprofessum ad nutum Abbatis ducit in medium Capitulum, dum omnes detecto capite sedent. Deinde Magister novitiorum, Neoprofesso genuflectente, stans ad Abbatem versus dicit: “Reverendissime Pater, iubesne fratrem istum (fratres istos) ab hac die legere et cantare et in Conventu suffragium ferre, sicut et reliqui fratres?” Et Abbas: Eia, fiat cum Dei benedictione, atque fruatur (fruantur) iuribus ac privilegiis canonicis servans (servantes) in omnibus officia monastica.”